

四庫全書

集部

欽定四庫全書

集部

錢塘集卷八

詳校官庶吉士_臣馬履泰

檢討_臣何思鈞覆勘

總校官檢討_臣何思鈞

校對官主事_臣陳文樞

謄錄監生_臣黃臣鵬

欽定四庫全書

錢塘集卷六

宋 韋驤 撰

柵山驛早起

柵山孤驛夜寒清
襖被難柴坐遲明
行旆動時紅日上
肩輿經處白雲生
連峯峭恠濃鋪翠
流水盤紆數送聲
自喜區區王事外
縱觀佳境有餘情

望崖上遺構

萬仞蒼崖聳碧空誰為危室礧雲中雙扉虛闕無人到
疑是飛仙逞妙工

四十八渡

山盤水轉路岐開揭厲凡經六八回若向芳春桃盛發
幾何非自武陵來

送劉公儀典四明

人間離合固尋常契義稠重豈易忘崇政青春同擢第
文昌白首並為郎東城判袂情懷慘南國分符興味長

唯佇東風慰瞻望
治聲當不減龍黃

和何子溫郎中家園一首來詩有風月同吟之語

故篇末及之

江河清興渺無邊
又睹新詩憶故園
仙介雖欣搔癢背
布音還愧過雷門
祇聞松石誇朋舊
應免紛華遺子孫
何日幅巾陪燕坐
共將風月快吟魂

自峽之變過竹竿山

行路始知難覆盆
千石間為逃人鮓
甕敢憚竹竿山晚

日羣峰碧春風兩鬢班何時似都護還度玉門關

荅宋茂宗詩卷

夔府春殘暫息肩感君佳遺意飄然頓忘巖嶮三千路
為得風騷五十篇山水清音歸老筆琳秀氣滿新編
雖無健句酬來貺終日吟哦興自全

宿雲安雲巖寺

去國三千里攜家四十程雲巖暫投宿聊使夢魂清

雨中觀白蓮一首

終日飄零酷暑平白蓮池上獨含情已憐瑩潔添花色
更愛淋浪打葉聲宮女洗妝餘粉澤水仙歌弁濯瓊瑛
漫攜玉盞銜冰酒氣味須教一等清

讀潘閬再過錢塘一絕

昔年潘閬足詩情曾過錢塘眼暫明今日天涯聞此句
無窮鄉思逐江聲

和答韓侂之送行詩

歸隱無田計未成區區叱馭又遄征自慙白首猶尸祿

何補清時漫遠行談塵追思揮玉色送篇珍重發金聲
欲知天末相望處雲水蒼茫白帝城

和荅劉子先舍人送行詩

梯險航深岐路賒國恩未報敢咨嗟感公秀句渾驚俗
送我孤蹤遠使巴民訟稀疎幾吏隱官居岑寂似山家
舉頭霄漢思賢躅聊和來篇示拜嘉

明恕齋

明恕題標榜心隨目所瞻平反長在念燕適自無嫌山

氣侵朝幌江光射畫簷幾何非吏隱危坐興難厭

中秋夜待月不見一首

中秋待月異尋常桂魄如何特晦藏疑是天心忌盈滿
故將雲影蔽輝光徬徨注目瞻霄漢冷落呼燈照豆觴
須記今宵有餘恨明年此會莫輕忘

寄明守劉公儀

去年更直宿文昌今日睽違各一方遐想四明安坐府
肯思三峽險乘航恨無羽翼親談席應有笙歌簇燕堂

舊好未宜因遠廢郵筒時且寄篇章

九日

重九蕭條秋已深登高更在蜀江潯
黃花未肯趁時吐白酒祇如常日斟
絕塞煙雲長滿目故園風物愈關心
須憑醕酎酬佳節追感齊山不浪吟

宿縉雲僧舍一首

石磴躋攀上縉雲九峯蒼翠與天鄰
巖崖佛屋疑神助煙靄禪局絕世塵
此日來軺宿寒夜他年屈指數青春

山僧莫笑恁恁去尋勝能來有幾人

過溫湯寺一絕

一竇飛泉煖似湯池魚無數自洋洋不須遶寺尋碑刻
知是南平古道場

武龍道中

四十年前前進士三千里外外官人手提邦憲平冤抑
敢不公心報大鈞

放船一首

崢嶸歲垂盡泛鷁下岷江鳴櫓風聲壯搖旌日影雙巨
灘何累累急鼓促絳絳語疾軀生翼論危頸縮腔栖遲
憑漆几睥睨近紗窓解纜侵朝霧休程傍晚砑童山連
岌岌古木競縱縱岑絕行荒縣間闕按列邦俗書慵注
目薄酒倦開缸仙迹徒追羨如忠之豐都景德觀有王
方平陰長生五雲洞及萬
之南浦有名篇乃素降如忠有白傅詩
變有杜子美詩有誰陪疊疊竟
岑公洞
夕聽淙淙幽興將詩遣還嗟語意厯

正月二日飲茂宗官舍一首

然燈數百照青樽香穗縈回酒半醺却怪預為元夕態
撩人鄉思亂紛紛

咏八仙

撚鼻

道氣本冲融胡為撚鼻中知無願言噓聊以快吾衷

爬背

刻成纖手利癢背可施功豈待麻姑爪攜持意自通

呵欠

引手如雙翼俄然一欠伸須臾端顧眄別是好精神

擗髮

搔首意不滿聊憑象擗功高情唯自適宜恆鬢如蓬

鼓琴

萬事不關心悠悠在一琴非山亦非水何必問知音

吹簫

內樂本無聲吹簫且任情於茲代長嘯自是一般清

橫笛

不是樂繁音吹揚興自深數盃醇酎罷更學水龍吟

撚耳

撚耳意陽陽林泉白晝長市朝聲自遠聰聽又何妨

丁承受放目亭一首

擇地為亭智思全飛甍如翼插蒼煙身栖一闕喧聲外
目逆千山秀色邊臘雪春葩饒映帶峽雲江月每流連
所嗟此境藏夔府不入當年子美篇

人日太寧道中一首

改年三日立青春涉七風光日日新列岫漸生千霽媚
幽禽初弄小聲勻籃輿度嶺官兵汗紅旆穿林野雉馴
白髮自憐猶遠使何時歸棹浙江濱

白帝祠一絕

瞿塘峽口江聲急古木陰中白帝祠猶有餘靈憑險阻
往來舟楫禱安危

奉節道中望羣山有雪

臘去春來只數朝遠山殘雪未全消崑岡玉出清光瑩

滄海潮橫白浪遙天外畫圖終日展雲端仙佩許誰邀
長途極目添幽興更折寒梅渡野橋

和劉公儀見寄

崎嶇巴峽走單車瀟洒鄞江想載旗馳款比追前日好
開緘忽奉去年書篇章互及情皆見蹤跡相睽義不疏
但使鱗鴻勿虛過何須臨紙恨躊躇

忠州木蓮花二絕

喬木開花似水蓮畫圖遠自昔人傳

唐白傳有畫木蓮花圖

化工

既許殊凡品落在遐方亦可憐

綠葉枝頭灼爍紅尚疑輕易比芙蓉根苗不自污泥出
只合移栽近佛宮

寄明守劉公儀

海角天涯相去遙郵筒還往勢迢迢兩篇佳咏兼金重
三復長吟萬慮銷已向宦途驚聚散休將桂籍論榮凋
承誇倒載清歡數使我流涎鄉思搖

擺繡雞

異質本難馴金籠擺繡頻文華真出類舒卷速如神怒
角雙枝翠垂綫九葉新燕堂春畫永注目屢逡巡
一片垂丹臆鮮明錦不如殷紅間深翠半斂又全舒未
遇奪真畫猶虛博物書雖非孔鸞比儻可詫其餘

戲答宋茂宗

穿山君蹈險逆浪我乘危王事以勤濟人生少暇時多
材看騰蹕無補愧衰遲已飽殊鄉味何煩覺後知

子至
部後

歲
餘

寄李世美

都門執別再經春相望天涯引脰頻
峽外山川愁倦翼
江西風月羨怡神來書雖闊情還密
舊咏重窺意似新
聊寄短篇追往好莫緣無雁便因循

送宋茂宗

三年持節使巴夔今日飄然受代歸
去掉勇爭江水急
前旌遙趁峽雲飛
陟明佇聽躋華貫
榮觀應欣著綵衣
肯記天涯留咏處
翠巖幽洞亦幾稀

渝南九日

草草開筵重九日區區奉使第三年黃花不肯趁時節
薄酒可堪無管絃秋雨岷山猶漲水夕陽巴嶠自生煙
登高興味空惆悵萬里鄉關在目前

南陵坡

南陵坡對巫山縣直上青冥百八盤此日身由歲巡到
他年愁向畫圖看可堪雨濕羊腸險更怯風衝狐腋寒
却想九天朝謁罷禁街平穩躍金鞍

金山

金山目逆路之隅峭壁奇峰畫不如若使崢嶸近京雒

未應聲價減南徐

潤有金山在揚子江心

瘦驢嶺

馬瘡前咏閔馳驅登嶺今朝歉瘦驢自是老來情味減
欲圖靡盬可安居

石榻平望七峯山

路過黔江石榻平七峯奇傑翠崢嶸祗應自有神仙宅

肯向人間浪得名

宿木宗驛

涪州武龍界

暮投荒驛傍巖隈更折聲頻夢易迴
半夜忽驚飛霰急凌晨還喜凍雲開
雪凝山表平如截梅發林坳迴若堆
問俗觀風何所補勤勞唯有馬虺隤

二月

二月渝南春已老西園桃李頓蕭然
傍簷飛絮紛如雪貼水圓荷大似錢
覽物未能忘感槩紓情聊且綴詩篇

馮郎白髮知多少更向巴山聽杜鵑

鄰垣

官路蹉跎晚景斜更堪蹤跡在天涯江春已老猶寒色
山雨相仍減物華留滯唯知搔白首衰疲何可泥丹砂
無聊情思翻成喜喜見鄰垣架上花

壽安縣君挽詞一首

鄉黨推賢懿宗姪慕孝慈享年非及耄造物固難知神
護銘旌遠龜從葬宅宜幽冥復何恨夫子映清時

再和張從道

二月

天氣融融近禁烟
巴渝風俗自熙然
排門沽酒易成市
著處看花不用錢
一帶江山入圖畫
幾番雲雨促詩篇
獨嗟久使無裨補
終日歸心趁杜鵑

鄰垣

官舍相依吾二家
碧山之麓水之涯
祇知閒暇交談屑
不覺逡巡改歲華
坐喜良農得趁麥
行聞異俗貢鹽砂

近報張程二蕃已到漆川堡予昔官
主客閱西南諸蕃貢目唯貢氊砂
銜杯且盡兵厨釀

安用呼兒索五花

和唐韋相國盛山十二咏

宿雲亭

無心固無戀猶愛宿危簷
況復尋幽客高情豈易厭

隱月岫

隱月月非隱岫名誠強名
清光中夜滿誰謂礙崢嶸

茶嶺

種茶當嶺上日近地先春始自鉤陶手遺芳及後人

梅谿

青影籠寒水幽香逐晚風和羹人已遠谿上自芳叢

流杯渠

渠灣水流速杯漾酒行遲莫謂經營巧清懽得所施

盤石磴

盤石以為磴縈紆上翠岑披雲矚佳境適此慰登臨

桃塢

當日桃花塢多應傲武陵春風今寂寞猶以舊名稱

竹巖

擿密翠嬋娟結根巖石前不饒塵土地自信雪霜天

琵琶臺

象物名臺孰琵琶出自然登臨得真趣所樂類無絃

胡蘆沼

沼有胡蘆狀成非疏鑿功宵澄星月影彷彿似壺中

繡衣石榻

繡衣無已久石榻尚依然不識尋山客幾人能愛賢

上士瓶泉

上士體虛無瓶泉與道俱倘餘涓滴潤可救衆焦枯

清遠閣

屹然虛閣並蓮宮似出塵寰擾擾中浩蕩乾坤來爽氣
崢嶸欄楯倚晴空江奔吳楚流何急山接岷峨望不窮
清遠榜題真有意登臨聊以裕吾衷

橫翠亭

勝槩本天成，增營智亦精。何年丹檻敞，終日碧山橫。
青靄飄來薄，澄江瀉去明。官居況相迺，杖屨不勝情。

九日

四逢九日，峽江湄竊祿無功，祇自嗤把酒又遲。今歲菊
開，編還愧去年詩。牛山悽感，何其昧藍水歡吟，乃所宜
白髮不辭吹帽落，更登山閣醉佳時。

答王晉叔

區區行役，臨南浦忽奉來書，墨未乾見報，新恩移毫社。

便疑衰迹近長安山危水惡行將免
宦思鄉情日漸寬
朝夕放船來就別贈言應許遺琅玕

遇黃志仁

舟楫逢迎涪水濱久違應訝鬢霜新
按廉雖共相望闊
邂逅於斯兩喜鈞對艤晴沙旗影動
交談寒夜燭花春
遲明又向東西去回首滄江霧色勻

別張從道

官居相並日相過盈歲光陰不覺多
每幸開心互詢度

都忘倦迹久蹉跎
新除忽遂東歸欲
雅好其如遠別何
把酒不辭金盞溢
預將離索就消磨

別王叔重

區區奉使越三年
晚得渝南刺史賢
美政日間行舊學
高懷時見發新篇
近違方得揮談麈
遠別俄驚徹祖筵
回首寒江初放鷁
牙城隱隱隔雲煙

送張公度之官南安

盡道清時多汲引
夫何高翮尚卑棲
迨別乘欣然去

苒苒輕裝寡所齎坐想推餘先嶠北行聞流譽出江西
更將學行規逢掖桃李無言下自蹊

送勝之宰仁和

霜風掠野卷愁雲紈紈催船畫鼓頻方喜鄉閭得賢宰
却驚燕席失佳賓去鄞迤邐窮殘臘渡浙依稀傍早春
恰幸主人真愷悌承宣相與慰斯民

和舒信道中丞

臘月纔飛玉律灰物情已若在春臺高懷果動山中興

秀句歎從塵外來
兵釀可應隨日熟
官梅能不為時開
何當舉白西河上
茗芋須容倒載回

又和

淺雪初成玉石灰
冒寒擁腋上層臺
那嗟晚景催人老
且喜新春入手來
戢戢庭萱芽始迸
娟娟池柳眼先開
幾回騁望南湖轍
坐想高談腸九回

臘月十八日乙卯立春丁卯會飲開元呈信道中

丞

瀟洒江城雪後天
訪尋幽境就開筵
數聲晚角催殘照
三日新春入舊年
鼎坐探題頻擊鉢
杯行度曲有危絃
莫論俯仰成陳迹
頃刻清歡亦可憐

再和

湖山清迥雪霜天
結客尋幽布錦筵
猛作清歡送殘臘
冥搜佳句待新年
共欣愛日臨樽俎
暗覺和風入管絃
數品香葩為時發
潛知造物以相憐

春後五日即事呈信道中丞致平學士

閑餘中朔蚤歲暮已春回
沼沚全消凍林園半落梅
南風濕舊礎暮雨送新雷
節物逡巡變衰顏忍不開

再和二篇

會飲臨登燕亭逢春第一回
箏移未歸雁笛送已飄梅

北海俄空酒南山忽隱雷
交談幸投隙塵慮此時開

春歸雖斗頓寒去尚裴回
已放沙草猶將雪掩梅
清吟陵鮑謝高誼薄陳雷
倘緩西行興芳筵願數開

復以前韻示別

泛鷁茲辰去前騶幾日回離觴醕浮螳暮角聽吹梅雪
嶠初消玉濤江遠震雷應多解頤句歸覲錦囊開

元正二日小宴呈席客

二日新年半月春朝來小雨破輕塵依稀帶雪梅枝老
髣髴籠金柳色勻投隙會并宜勉強轉頭光景祗逡巡
不應萬點花飛後方許傷多酒入唇

和章致平西興見寄二首

金玉來音忽邇聞開緘恍若對丰神始知渡浙元宵逼

遙想乘時樂事頻恨不銜杯同此夕

十五
日書至

可應聯咏

屬他人果然佳句先垂寄依舊餘輝返照鄰

天為元宵卷暮雲團團放出月精神隨時行樂與民共
若處觀燈徹席頻玉笋坐邀同醉客瓊枝懷想未歸人
更抽鄙句招回棹早復官居壯德鄰

石都講仲謨挽辭二首

高翮欲騰超年華忽早凋名言在宗室休譽滿公朝卜
遠靈輿逝傷春挽鐸搖南明此時路花草為蕭條

桂科名舊峻玉殿對新歸異寵行將及英魂遽已飛貴
來年不待志在命先違還葬春山曉空歌薤露晞

嘉燕堂

屋角翬飛棟宇深簷前老木翠森森琤琮雖欠泉聲玉
瑣碎仍多竹影金勝槩豈顯供主席清驩唯欲浹朋簪
但令廣座嘉賓滿不惜融樽罄所斟

九經堂

屹屹危堂近紫煙傍堂雙檜亦參天四時風月收羅盡

千里山川矚望全
既展登來何必蠟
陶琴攜上不須絃
賜經雖缺名猶在
此樂終為古所賢

鑒亭

虛亭屹立沼中央
古匠施工亦異常
略約相聯虹對影
連漪四面鏡涵光
雕楹圓檻環然敞
碧瓦飛甍勢欲翔
杖履時來滌塵慮
可能隨事見毫芒

探春軒

東園亭榭巧相因
更闢東軒探早春
面直小橋通沼汜

背臨宏構擁松筠
鳥鳴魚躍先時得
柳綻桃苞入眼新
造物也知搖落久
應憐著意同芳辰

宿鳳亭

碧梧千尺覆欄楹
宿鳳何年被美名
鸞雀不棲如有畏
煙雲常近豈無情
林間日月於茲永
物外塵埃豈復生
危坐忽驚年籥晚
漫吟嘉瑞樂昇平

和舒信道二首

樽前雖闕舊年人
舊事重論迴若新
記得長春為絕唱

依稀難和似陽春

謫仙居處枕湖邊
手種垂楊已繫船
勿謂門庭岑寂久
天將巨用理當然

和信道以詩見邀

搖搖畫隼過寒汀
為得新詩欲餞行
飲散十洲回首處
暝煙疎柳不勝情

次韻周開祖清明會景之作

難并四者重良辰
寒食風光澤國春
日滉湖光千頃綠

煙披汀柳萬條新
鈴齋投隙登臨好
吟筆裁篇氣格淳
顧我不能酬絕唱
聊將鄙句慰邦人

又和會月波樓與范德鎮賡唱之什

屹屹樓依檇李城
月波標榜映雙楹
未逢秋夕披襟坐
且向春風曳履行
詩伯高篇先獨唱
使君健筆許誰爭
還朝滯客方無賴
對此飄然思亦生

吳大夫挽詞二首

浩氣忽凌虛飄然厭虎符
風流失循吏術學喪醇儒
飛

旄衝霜外哀歌慘路隅螭虬有賢嗣遺憾想公無
邂逅淮東別逡巡二紀餘豈期還故里止得望靈輿直
道欽遺譽高門仰舊居鄙情憑薤唱聊以解欷歔

至節蔣穎叔見召以病不赴

一陽潛復自黃宮難變霜髯作少容方伯以時均宴衍
野人不幸因龍鍾望塵修敬慙無及舉白承懽恨莫供
但有誠心騰善頌願隨壽筭祝椿松

和周開祖即席

海雲收雨作新晴
春日開筵趣早成
六席共年誰獨少
千齡幾半互相兄
須憐東道情尤厚
況是西歸蓋始傾
更玩掌中珍句好
不知簾外玉蟾生

和周開祖賦會有美堂呈權府察院

共陪紅旆陟巍峩
有美軒楹氣候和
樽酒融融懽廣座
梁塵拂拂應清歌
風隨江浦霜濤急
日下湖山翠靄多
何處追談此佳趣
主人不晚在鸞坡

和宇伯修侍郎會中和堂二首

燕堂高會勢巍巍拂面薰風氣候和廣座初陪文字飲
滿城重聽袴襦歌錦袍藉舞矜回雪玉塵揮談沛決河
牧伯娛賓同衆樂庾公清興未為多

華構崢嶸倚碧霄開筵瀟灑聚英僚衣霑翠靄天收雨
目送銀山海上潮半日清歡浹觴咏幾番涼吹韻笙簫
醺酣老客依幃庇歸隱而今豈俟招

憶遊金華洞一首寄婺守陳子文

不到金華四十年碧溪深洞想依然故人為郡應多暇

何日雙旌翠靄邊

和宇文侍郎觀潮

江上雙峯屹若門，秋潮湧出勢橫奔。
先聲何翅雲雷震，猛逝直疑溟海翻。
壯觀平分吳與越，激波遙自巽之坤。
驅除殘暑長空凜，噴薄晴光列岫昏。
衝涉唯驚凡舟楫，遷騰那復論鵬鯤。
仙槎遠泛時相際，野馬兼馳力更掀。
華信築塘無宿恨，子胥乘浪有忠魂。
吳兒勿詫輕身弄，自古馮河豈足言。

送吳聖取給事

忠嘉早結九重知，隙駟徒驚晷景馳。
祥鼓素琴猶累月，恩除青瑣已先期。
秋風慘處違丘壘，霜柳疎中即路岐。
得志澤民賢者事，佇觀功業映清時。

送深閣梨之越開講

家世事簪紳，方袍早出塵。
詩書捐舊習，戒律悟前身。
杯度吳川雪，經繙越嶠春。
逆知專講席，著意警迷津。

和韓琯山齋

愛君築室踞青山高躅寧容俗士攀
吏隱幽懷潛物外詩成秀句落人間
濤江遠向窓扉見竹塢靜宜巾履閒
顧我衰殘倦登覽偶來聊此共開顏

劉握大夫挽詞二首

平生端素履四紀仕清朝移守將前邁
修齡忽後凋琴書遺淡泊几杖捨逍遙
有子先承績幽堂慰寂寥棄養臨茗水
傳聲到武林仁賢沒何遽老友慟尤深
珠玉藏前咏風標起舊欽靈輿不克送
薤唱寓空音

劉欽止承務挽詞一首

年始踰強仕俄從逝水沄
祗應懷永慕遂爾繼先君
利器方施手高翔未及雲
嗚呼今已矣衆歎漫紛紛

錢塘集卷七

欽定四庫全書

錢塘集卷八

宋 韋驥 撰

利州路轉運判官謝上表二首

皇帝

臣某言伏奉告命授臣利州路轉運判官已於四月二十九日到任管勾訖漕將之選誤及孤蹤敕戒之嚴仰膺睿訓兼修程而叱馭涓吉日以莅官

責重望輕迹榮心愧臣某誠惶誠懼頓首頓首伏
念臣智非應變學愧知方篆刻文章竊儒科於皇
祐之末間闕州縣脫選調於熙寧之初僅三紀以
逶迤秉一心之朴拙俛仰恥隨於曲俗卷舒輒意
於古人不希畫餅之虛聲唯遠素餐之公患而蔑
然善狀慙五十之無聞故慨若昌辰念千一之徒
遇分永投於冗散甘自棄於輪囷豈圖冒被宸俞
濫分使指况遠方之所寄在慎東以尤詳若臣之愚

其實非稱此蓋伏遇皇帝陛下皇明委照鴻造曲成網
羅遺材網紀至治拔淹振滯盡公議於一時進善黜邪
宣休風於四海曾惟微叢亦玷選掄臣敢不勉罄其衷
恪修所職省徭均賦下齊郡邑之為肅吏寬民上副朝廷
之意庶幾補報少助涓埃臣無任瞻天荷聖激切屏營
之至謹奉表稱謝以聞臣某誠惶誠懼頓首頓首謹言

太皇太后

臣某言同擇使遠方豈容虛授擢材多士必厭公言寒

蹤獲預於遣中驚寵實踰於意外即星馳而就職唯夕
惕以疚懷臣某誠惶誠懼頓首頓首伏念臣性本倥侗
器非宏博早塵科第久玷朝紳齟齬百端固乏趨時之
智蹉跎三紀信知行學之難念倖位以是羞肯苟為而
自棄晦迹或幾於瓦合存心寧蔽於雷同然而歷郡邑
以承宣曾微善最累歲月而遷陟僅脫譴訶方偃仰於
熙辰敢覬覦於銳進夫何天幸茲被甄收付之漕運之
權飭以訓辭之戒在於遭遇奚以克勝此蓋伏遇太皇

太后陛下化極聖神仁濟覆幬增廣太平之業延洪累
盛之朝為官擇人每資於博採因能任職必協於僉諧
迺若孤生亦叨煩使臣敢不竭誠莅事勁節徇公激濁
揚清勸十州之吏治抑強扶弱安一道之人情期有補
於毫釐庶不辜於驅策臣無任瞻天荷聖激切屏營之
至

賀擒獲鬼章上皇帝表

臣某言伏聞八月十九日諸將攻圍洮州擊破蕃賊生

擒首領鬼章等者戎虜肆兇驟于邊障神兵仗義生獲
渠魁稟聖筭於無前伸國威於不陣蠻夷膽落將帥凱
還四方傳聞萬口稱慶臣某誠歡誠忭頓首頓首竊以
虞舜舞干而苗格周文因壘而崇降蓋聖明之德動於
無知則桀黠之情感而自悔倘拒違而不改固翦滅以
為宜何茲醜類之尤獨昧盛朝之化暨聲教而狼心如
故霑雨露而蜂蠆復生輒興犯塞之狂以取覆巢之禍
皇赫斯怒秋霜助肅殺之嚴天奪其心晚霧絕遁逃之

計縛酋豪於反掌埽種落於亡蹤自昔命征之雄微斯
決勝之敏此蓋皇帝陛下神機淵妙睿斷高明既隆柔
遠之文復振摧姦之武威加聞外鼓行皆貔虎之師勢
震洮東係頸盡氐羌之長正邦刑於萬里壯軍實於一
時臣拘迹遠疆馳誠雙闕阻觀都護歸奉萬年之觴徒
效詩人仰歌三捷之咏臣無任瞻天望聖喜躍屏營之
至謹奉表稱賀以聞臣某誠歡誠忭頓首頓首謹言

太皇太后表

臣某言伏聞八月十九日諸將攻圍洮州擊破蕃賊生擒首領鬼章等者天威震遠塞境戒嚴將略受成兌渠就執埽蕩豺狼之窟振揚貔虎之功風聲所加鼓舞以聽臣某誠歡誠忭頓首頓首竊以犬戎遺種鬼族擅強屢擾邊陲久逃鈇鉞貪鷙之情不已猖狂之計復興脅黨類以相連嬰城郭而自固未伸螳臂死當戰陳之前已屈獸心生致檻車之內俾遊魂於霜鏑將就戮於橐街惟茲斬馘而獻俘甚若摧枯而拉朽轟雷霆於絕域

重華岱於偏師壯驩呼於奏凱之間雖同自昔紀擒獲
於書勲之際獨盛於今此蓋太皇太后陛下道合高宮
德均厚載武不黷而所修必備兵不玩而所舉必平致
其專閫之臣應機以勝猝彼黠羌之首係頸而旋正治
世之大刑增熙朝之偉觀臣尸官遠部引領上都念阻
造庭共慶捷書之獻願聞虛堠永光信史之傳臣無任
瞻天望聖喜躍屏營之至謹奉表稱賀以聞臣某誠歡
誠忭頓首頓首

福建運判謝上表

臣某言伏奉告命授臣充福建路轉運判官臣已於二月十九日到任管勾訖仰冒宸恩再叨使指跼踖訓辭之重烏敢少忘精勤職事之初唯憂不稱臣某誠惶誠懼頓首頓首伏念臣倥侗末學樸樸小材遭逢聖時黽勉仕路竊第倏逾於三紀恪官數歷於四朝雖微績效之可名固有朴忠之自信頃繇誤選嘗使遠方賴德澤之廣而年登盜衰幸教令之明而民紓吏戢汔終更而

安守獲逃譴以代歸巴蜀十州方休於督察甌閩一道
復佐於轉輸奔走周星之間崎嶇萬里之半顧身勞而
何憚念責重而可虞短技易窮懼難堪於屢試壯行不
競徒有愧於初心旋省微軀曷膺煩使此蓋伏遇皇帝
陛下堯仁徧覆舜智兼明愛人及物則不異邇遐為官
擇才則罔遺鉅細如臣孤拙尚預采收申命丁寧尤矜
幽遠臣敢不夙宵盡瘁俛仰竭誠進善糾邪庸警齊於
衆職興利除害以便安於列城庶幾犬馬之能不負乾

坤之造臣無任瞻天荷聖激切屏營之至謹奉表稱謝
以聞臣某誠惶誠懼頓首頓首謹言

謝恤刑詔書表

臣某言進奏院遞到詔書一道賜臣令恤刑禁仍散下
管內常切提舉無令曠慢者天時方暑起畏憚於羣心
宸詔遽頒戒滯淹於庶獄奉十行之申飭督列郡以遵
承共深欽恤之懷上副丁寧之訓臣某誠惶誠懼頓首
頓首恭惟皇帝陛下德參覆載道極聖神徧愛追堯舜

之仁措刑邁成康之術雖存五辟以助治每慮一夫之不辜眷盛夏之在長軫纍囚於率土敷揚明命儆厲攸司潔完先自於圜扉滌濯仍臻於三木貧而無餉者給之以粟疾而難縱者濟之以醫期無淹繫之徒必絕濫加之罰幅員萬里競趨遠罪之風遐邇一心咸戴好生之惠臣敢不仰膺言綽恪舉憲條勉一道承宣之勤寬九重矜惻之廣庶幾犬馬之效不負乾坤之施臣無任瞻天望聖激切屏營之至謹奉表稱謝以聞

代虞學士遺表

臣某言逢辰竊祿愧乏涓埃之勞忍死獻言徒伸犬馬之戀脫官聯而安沒荷乾造之有終重違清時猶抗餘息魂欲去體辭多不倫臣某誠悲誠懼頓首頓首伏念臣生而朴野學亦空疎蚤塵儒科晚玷文館義有可守則未始枉尋而直尺事有可舉則罔或吐剛而茹柔間闕三紀之餘遭遇四朝之盛荐叨器使獨病材難敢謂致身之未高唯憂陳力之不迨贊畫天府嘗助浩穰之

煩曳裾王門久尸講解之職而桑榆勢迫藥石功虧疾
疢暴深精爽垂盡想赤墀而隕涕瀝血懇以懷慙直節
何為殊無報國之效哀鳴不已尚冀敝帷之恩伏望皇
帝陛下特軫天衷曲從人欲憫其舊物貸以深仁俾臣
遺蹤獲有箕裘之紹則臣瞑目甘為溝壑之捐臣歷任
三十七年並無譴累久在諸王府供職見理提刑資序
本家未有兒男食祿欲乞一恩例霑及寒族臣長男芹
年若干曾應進士舉得解伏望聖慈特賜俞允於文資

內安排干冒旒宸臣無任兢危隕越之至謹奉表陳乞
以聞

代楊侍郎謝授寶文閣待制知廬州表

皇帝

內閣寵名實中朝之高選方州重寄乃外補之最榮拜
優命以稠重揣卑悰而警惕中謝伏念臣降才不敏涉道

非深遭逢盛時叨竊撫仕守朴忠於無撓當盤錯而勿
辭嘗濫長於理官每戒得情之喜繼忝陪於司寇第謀

助治之寬旋陞民部之劇繁唯謹邦財之經費雖無善
狀亦免瘵官冒先皇拔擢之恩蒙陛下包涵之賜日月
浸永筋骸始衰比緣銜命之勤偶致愆和之疾難久妨
於賢路仍倖處於省曹陳誠輒叩於九重引跡頻尸於
一郡傾葵心而仰俟感天聽之曲從以禁近之職而飾
其陋軀以安閒之壤而使之顙面恩出望外愧深胷中
夫何微蹤及此厚幸此蓋伏遇皇帝陛下韓聖神之妙
廓天地之仁憐其犬馬之勞假以丘山之惠臣敢不深

銘悃幅虔奉龍光夙夕兢兢方守循牆之戒始終皦皦
彌堅報國之心臣無任瞻天荷聖激切屏營之至

太皇太后

效職累年恐衰疲之敗事露章兩上堅懇乞於罷麾恩
俞既與其便藩寵秩復加於內閣仰承優渥深積兢惶
中伏念臣本出寒儒早從末宦勤勞三紀朴拙一心幸
逢盛世之明昌叨遇元朝之獎拔擢由棘寺進貳刑曹
殊未著於官能驟已陞於民部事之利疚罔不竭精時

所戚休得以宣力更炎涼而浸久偶瘵曠之未形方懷
持祿之慙敢銜剝繁之術陛下未加顯黜尚謂小材輟
其坐局之勤付以出疆之命冒苦寒於遠道感微疚於
中宵迨此使還難安省列竊畏尸官之譴且慮妨賢之
譏遂亟請於偏州冀少全於素分天威重冒方懼雷霆
之嚴聖造曲從遽蒙雨露之澤畀之禁近之職授以清
閒之邦於臣所望有加若臣何幸及此此蓋伏遇太皇
太后陛下神機運用坤德包涵憐其孤進而無他憫其

久勞而不懈徇犬馬之私欲推丘山之至恩臣敢不激
勵懦衷祇膺明命誓秉縻捐之志終酬覆載之仁臣無
任瞻天荷聖激切屏營之至

知廬州到任謝上表

皇帝

臣某言伏蒙聖恩授臣充寶文閣待制知廬州已於某
月某日到任訖職扶既優幸參華於內閣事權甚重顯
分控於長淮方謹始於頒條唯厲精於宣化自慙朴拙

實玷龍光

謝中

伏念臣早緣末學竊綴下科崎嶇歷官

勉從政積寸長而何助懷小智以無堪越俎治庖戒於
侵職畫墁志食恥在素餐宜於公者勢可舉而必行便
於時者力可為而必盡久刺理官之劇再遷省部之煩
愆尤偶逃疲薶非稱乞郡章而外補感天聽之下從途
不束裝已獲承宣於善地身雖去國仍叨侍從之榮名
仰冒誤恩深踰素分此蓋伏遇皇帝陛下至仁覆露洪
造包涵察其技窮而猶未遽捐念其勞久而假之暫逸

臣敢不始終一節夙夜竭誠撫養羣元上廣堯舜之澤
望瞻首善遙馳魏闕之心庶殫犬馬之能仰答乾坤之
施臣無任瞻天荷聖激切屏營之至

太皇太后

臣某言

同前

文閣清華叨誤恩於增秩淝川曠靜冒優寄

於分符下車首見其吏民奉詔仰宣於德澤力輕任重

心愧迹榮

謝中

伏念臣樸樾微材斗筭淺器出逢盛際進

躡周行義有可為則奮不顧軀道之所枉則恥於投步

頃貳刑曹之要荐陞民部之煩渠渠唯盡於公忠碌碌
苟逃於謗責偶愆和於弱質輒露請於偏麾遽蒙天眷
之曲從復過愚衷之始望忝近班之貴飾獲善壤之寬
閒去國不遙目想雲中之雙闕幸時無事坐安淮右之
列城方莅政之云初念致身之有自此蓋伏遇太皇太
后陛下運聖神之造垂雨露之仁察臣悉力有涓埃之
裨貸臣少休俾承宣於外加寵光而汎及庇孤陋而曲
成臣敢不恪守官箴勤恤民隱廣朝廷惠養之意成猷

畝便安之情冀徵助於隆平庶仰酬於覆育臣無任瞻
天荷聖激切屏營之至

賀坤成節表

金風應律當造化之成功玉殿稱觴慶聖神之誕日四
海致梯航之獻庶邦傾葵藿之心熙然覆載之間幸此
明昌之會中恭惟太皇太后陛下覩天唯睿御世以仁
翁張萬微鼓舞羣動力庇帝國之盛道侔坤德之宏慶
辰密邇於中元賀禮交修於上國請方前古遠超文母

之微願比南山盡效華封之祝臣忝司偏郡阻造彤庭
奉萬年之杯既遠鷄鸞之列望九重之闕但馳犬馬之
情臣無任瞻天荷聖抃蹈激切之至

夔路提刑謝上表

臣某言伏奉告命差提點夔州路刑獄公事已於三月
十七日到任管勾訖列職禮曹瀕竊郎潛之奉按刑夔
服仰承聖訓之嚴即叱馭於險途已蒞官於遠部才微
責重心惴迹榮臣某誠惶誠懼頓首頓首伏念臣起自

諸生幸於久仕中立雖完於素守壯行已負於初心不
攘畫餅之虛名唯恥獲禽之詭遇自叨使指屢易歲華
嘗再領於轉輸並偶逃於瘴曠已聞兩部首尾六年川
陸兼行往還萬里一忝司賓之選每懷尸祿之憂方謀
自斂於冷官豈謂復叨於煩使況庶獄必資於明慎而遠
眚尤在於撫綏非高材不足以窒羣枉之萌非精識不
足以糾一成之失此焉退省臣則冒居斯蓋伏遇皇帝
陛下獨化日新至仁天覆明罰止期於助治好生深軫

於非辜不限地之邇遐必擇人而刺察曾惟陳力之末
亦被遣行之光臣敢不益勵愚衷虔遵渙命責羣吏盡
心之實必使無寃成一方遠罪之風庶幾有補下伸蠅
蟻之志上報乾坤之恩臣無任瞻天荷聖激切屏營之
至謹奉表稱謝以聞臣某誠惶誠懼頓首頓首謹言

謝賜厯日表

臣某言今月十九日進奏院遞到准太史局牒送到合
賜紹聖三年厯一卷者恩出中宸頒朔必先於正歲厯

由太史授時爰及於遠方捧受致恭奉行知敬臣某誠
惶誠懼頓首頓首恭惟皇帝陛下對天御世稽古保民
分飭義和之官詳推日月之運筭成密法示陰陽消息
之期布在綿區儆稼穡艱難之序臣敢不虔遵國令上
體君仁糾正奪農之違戒除暴物之戾庶圖小補仰報
大鈞臣無任瞻天荷聖激切屏營之至謹奉表稱謝以
聞臣某誠惶誠懼頓首頓首謹言

又

臣某言某月某日進奏院遞到宣一道賜臣紹聖三年
厯日一卷者厯為大紀協正統於天心恩出九重謹頒
宣於歲首按遠方而有守拜明命以尤榮臣某誠惶誠
懼頓首頓首恭惟皇帝陛下德命乾坤道齊堯舜發政
必循於時令成書爰敕於日官叅符緹室之灰密著清
臺之法布於率土使知敬授之方儆彼安厯不失先期
之備臣敢不欽承重賜敦諭列城助陽推慎罰之端順
序舉劭農之職庶圖小補仰報洪鈞臣無任瞻天荷聖

激切屏營之至謹奉表稱謝以聞臣某誠惶誠懼頓首
頓首謹言

又

臣某言今月十六日進奏院遞到宣一道賜臣紹聖四
年歷日一卷者君命布宣遠賜萬年之歷臣心祇敬率
同四海之濱方拜受以知榮遂寶藏而遵用臣某誠惶
誠懼頓首頓首恭惟皇帝陛下對天育物體道御民順
時令而陰陽弗違命日官而中朔必正書成大紀敕敬

授於攸司賚及萬方謹奉行於有政臣敢不恪承明貺
敦勉列城德刑循舒慘之期稼穡傲作成之備庶符協
氣仰贊昌辰臣無任瞻天荷聖激切屏營之至謹奉表
稱謝以聞

謝中使傳宣撫問表

臣某言今月二十九日入內侍省高品關琳到渝州
傳宣撫問者王人將命傳天語之丁寧臣子拜恩荷聖
衷之軫恤雖在方隅之遠如瞻象魏之光欽戴撫存竊

深榮悸臣某誠惶誠懼頓首頓首恭惟皇帝陛下仁參
覆幬明合照紹重熙累洽之休大持盈守成之德儲
神正寧不忘宵旰之憂興念遠臣尤憫邊陲之役遣使
星馳於萬里宣言澤及於四方臣敢不上體睿慈俯修
職業唯知盡瘁誓殫犬馬之能庶有微勞仰報乾坤之
賜臣無任感天荷聖激切屏營之至謹奉表稱謝以聞
又

臣某言正月二十九日巡歷至雲安軍遇入內侍省

內西頭供奉官王懷志傳宣撫問者星軺遽至臨六服
之幽遐天語敬傳冒九重之存撫光榮雖甚隕越是憂
臣某誠惶誠懼頓首頓首恭惟皇帝陛下治掩成康德鈞
堯舜運神機於獨斷紹先烈於重熙宵旰儲精措幅員
之寧謐歲時軫慮念邊鄙之勤勞遣中使以載馳恤遠
臣而敦諭絲綸降被戴恩知挾纊之溫葵藿齊傾向日
罄推心之赤臣敢不恪修職業上體睿慈誓殫犬馬之
能仰報乾坤之賜臣無任感天荷聖激切屏營之至謹

奉表稱謝以聞

謝恤刑勅書表

臣某言某月某日進奏院遞到勅書一道賜臣令恤刑
禁仍散下管內常切提舉無令曠慢者夏暑蘊隆動九
重之惻怛詔書敝勅軫庶獄之滯淹恪官況在於按刑
承命尤資於盡瘁寅膺欽恤之訓倍謹哀矜之誠居不
遑寧日惟加勵臣某誠惶誠懼頓首頓首恭惟皇帝陛
下天臨萬國子育兆民雖嚴五辟以沮懲不忍一夫之

抵冒念時炎燠難堪縲紲之中發號清明廣布幅員之
內聳有司之兢惕憫被繫以安全園扉必戒於潔涼三
木必勤於滌濯視貧而給之以食察疾而濟之以醫趣
聽獻於平停屏推求於滋蔓枉直悉由于審克重輕不
失其簡孚庶使無冤成圉圖空虛之治豈為小補助乾
坤長養之功臣敢不敬服宸綸肅持邦憲下繩郡邑共
堅慎罰之心仰戴朝廷推廣好生之德臣無任感天荷
聖激切屏營之至謹奉表稱謝以聞

又

臣某言今日進奏院遞到勅書一道賜臣令恤刑禁
仍散下管內常切提舉無令曠慢者天時方暑動宵旰
之儲思君詔遽頒軫寰區之庶獄虔稟丁寧之訓益勤
欽恤之誠戒飭列城奉行明命臣某誠惶誠懼頓首頓
首恭惟皇帝陛下愛民猶子覆物如天發施仁政而推
不忍之心明罰勅法而期無刑之治矜羣愚之抵冒慮
圜土之滯淹炎威當三伏之隆渙號達萬方之遠儆有

司之急忽卹被繫以求全潔清至桎梏之微濟助有餉
醫之給斥吹毛之滋蔓督閱實之平傳遐邇一堂孰起
向隅之泣生靈四面咸欽祝網之恩臣敢不敬服宸綸
肅持邦憲下繩郡邑效君子盡心之方仰戴朝廷廣聖
人好生之惠臣無任瞻天荷聖激切屏營之至

賀興龍節表

臣某言邁誕聖之慶辰大時成歲起祝堯之善頌四海
鈞情有生共樂於明昌無遠不同於鼓舞臣某誠懼誠

抃頓首頓首恭惟皇帝陛下運神明而獨斷繼統業以
丕承幹萬化以大中之權納羣元於至治之域允作百
王之高規豈惟三代之同風節應興龍感鴻圖之紀瑞
樂方儀鳳贊紫殿之稱觴臣忝使巴陸阻趨魏闕惓惓
雲漢倍深拱北之哀懇懇精誠虔禱後天之筭臣無任
祈天頌聖激切驩呼之至謹奉表稱賀以聞臣某誠歡
誠抃頓首頓首謹言

又

臣某言伏以律更大呂月臨成歲之功運應千齡天啓
降真之日萬物盡懷於生意四方共起其驩心臣某誠
懽誠抃頓首頓首恭惟皇帝陛下高邁三王丕承六帝
持盈成而寶龜鼎廓聲教而服華夷誕辰紀電斗之祥
光輝不極禮貢致梯航之獻鼓舞無窮臣承乏閩封馳
誠魏闕仰天威於不遠祝膺筭於無疆稱慶捧觴阻伏
簪纓之末傾心向日敢希葵藿之情臣無任瞻天望聖
激切屏營之至謹奉表稱賀以聞臣某誠懽誠抃頓首

頃首謹言

又

臣某言祥電繞樞應千齡之嘉運瑞冀夾陛茂八莢於
隆冬當聖人慶誕之辰正海寓太平之日羣生鼓舞萬
國梯航鉅恭惟皇帝陛下德耦堯仁明符舜智丕顯盈
成之業增高繼述之猷賞刑信而善惡勸懲聲教遠而
車書混一興龍紀節昌期協成歲之功儀鳳奏音列辟
奉後天之壽臣迹拘遐裔心仰嚴宸拱北傾誠悵周行

之獨遠望雲虔懇祝膚筭以無疆臣無任祈天頌聖激
切離呼之至謹奉表稱賀以聞臣某誠懼誠抃頓首頓
首謹言

謝轉官加勲表

臣某言今月初四日進奏院遞到告一道伏蒙聖恩授
臣朝請大夫仍加柱國者年勞無狀愧當考課之程國
賞有常獲冒陟明之典官勲並進榮忝兼深臣某誠惶
誠懼頓首頓首伏念臣江湖末族蓬華寒儒遭逢聖時

塵綴仕籍間闕幾及於四紀朴直唯肩於一心利於公
者知無不為施於政者思止其位壯行所學雖潛負於
素懷苟合以容固恥隨於流俗自叨簡拔愈竊兢危未
嘗枉道以求從何敢謀身而幸進備郎官於再歲持使
指於十年方虞總核之明難遁黜幽之辱第知分守豈
意序遷夫何累日之勤亦被自天之渥振遠方之觀望
增小已之光華拜寵若驚撫窮無措伏遇皇帝陛下乾
剛獨運離照繼明昭法度以綱紀四方審予奪以勸懲

多士俾庶績之咸考雖小臣而不遺遂令微蕞之軀輒
玷進陞之賜敢不永端晚節彌激懦衷受而益恭願效
循牆之戒圖其稱報用逃濡翼之譏更俯誓於糜捐庶
仰酬於覆燾臣無任感天荷聖激切屏營之至謹奉表
稱謝以聞

賀受玉璽表

臣某言伏奉近降德音敬聞五月朔受傳國寶禮畢者
聖政日躋協十年之景運珍符天錫垂萬世之休光禮

成大慶之崇澤霈四方之遠生靈鼓舞宇宙晏清赫然
昌辰偉矣盛事臣某誠懼誠忭頓首頓首恭惟皇帝陛
下德參堯禹道揜商周紹祖宗之業而增大盈成贊覆
載之功而致隆皇極刑賞明而必信賢邪判而不淆吏
稱民安同歸于治鳶飛魚躍各遂其情藹乎至符之充
紛若殊祥之應建安翔鶴裴徊和氣之游集慶靈光綵
飾太平之象於鑠咸陽之壤聿興玉璽之珍蓋神物之
護藏待聖時而呈露諸儒考古原至寶之攸傳路寢陳

儀敬高穹之所授新樂章而協比酌禮典以敷施輝映
古今震聳夷夏繼河洛圖書之瑞小郊藪麟鳳之祥受
命永昌寶篆顯延洪之福錫民大賚厯恩推宥過之仁
臣縻職巴陲馳精魏闕奉觴稱慶莫參鵷鷺之行拱極
傾誠徒想雲龍之會臣無任瞻天頌聖激切懽呼之至
謹奉表稱賀以聞臣某誠懽誠抃頓首頓首謹言

明州謝上表

臣某言伏蒙聖恩差知明州軍州事已於某月某日到

任管勾訖夔方按獄雖久尸官毫社分符未容及境優渥再承於明命光華假守於便邦已見吏民敬宣德澤臣某誠惶誠懼頓首頓首伏念臣蚤由末學獲仕昌朝審義命之可尊篤公忠而自信退有誠身之道進忘出位之思不為易缺之嶢嶢幾近無奇之碌碌曩誤膺於簡拔愧無補於事功區區使指之勤忽忽歲華之久念因循而冒處懼衰繭之難堪仰叨九閣覬州麾之可乞俯從微物荷天聽之不遺矧此近鄉畀之善地山奇

水勝昔人曾況於蓬丘事簡民良今日頗優於澤國載
惟委寄之重宜得承宣之能自揣不材誠為非據此蓋
伏遇皇帝陛下仁參覆載道極聖神增廣太平之基廓
開衆正之路公予奪以聳四方之聽均勞逸以懷羣下
之情迺以寒蹤蒙茲厚幸臣敢不恪修職業上體睿慈
知師帥不可以苟為思所以養人之術知民社不可以
虛受圖所以報國之勞庶幾循吏之徒不負大君之賜
臣無任感天荷聖激切屏營之至謹奉表稱謝以聞臣

某誠惶誠懼頓首頓首謹言

賀生皇子表

臣某言伏睹德音降生皇子者天心降鑒貽上主之鴻
休聖嗣誕生協萬方之大慶臣某誠懼誠抃頓首頓首
恭惟皇帝陛下堯仁博大舜智高明敷繼述以丕承保
盈成而獨化發政先好生之德開邊全不殺之威民物
乂安神靈悅善和氣四充於宇宙珍符並貺於堪輿緯
象昭垂炳前星之燦燦元良載育增景祚之綿綿壯哉

極治之洪基偉矣昌期之盛事臣叨分符竹遠仰闕廷
莫預鴈行共歡呼而稱慶第欽龍喜想慈惠之均霑臣
無任瞻天望聖激切欣躍之至謹奉表稱賀以聞

賀冊立皇后表

臣某言伏覩禮部錄降九月八日制書立皇后者冊命
隆恩推本元良之育宮闈正位密緊輔佐之勤懿德冠
於長秋喜氣鈞於函夏臣某誠懽誠抃頓首頓首恭惟
皇帝陛下堯仁睦族舜法治家以身為度而考古御今

以風化下而由內及外持盈神器雅協鳧鷖之文正始
祿衣昭顯闕睢之德禁掖仰徽音之嗣旋霄麗軒宿之
明允屬昌期式符盛禮臣縻軀守土注目望雲無緣稱
慶於周行但極傾心於魏闕臣無任瞻天頌聖激切欣
躍之至

賀收青唐邈川表

臣某言伏聞邈川青唐大首領率諸族歸順朝廷其疆
土置湟鄯二州者天聲遠暨坐收不戰之功戎族來歸

仰慕至仁之化不頓一戟而開邊千里不鳴一鼓而置
守二州解重鎧者莫匪傾心請長纓者豈煩虛論實無
前之偉績屬極治之昌期萬世輝光四方鼓舞臣某誠
懽誠抃頓首頓首恭惟皇帝陛下德威丕冒文武兼隆
端繼述以拱揖太平攬權綱以維持大業帝眷于上而
珍符雜沓人懷於下而異域柔從納鄯城於反掌之間
收湟水於銜璧之際行兵不試異周文因壘之降聖化
所徠同虞舜舞干之格廣幅員於無外耀方策於不窮

臣守職海隅不獲蹈舞闕庭臣無任瞻天頌聖踴躍懽呼之至謹奉表稱賀以聞

賀皇帝登極表

臣某言伏奉今月十三日赦文皇帝陛下寅膺顧命光紹寶圖號令惟新生靈胥慶臣某誠懽誠抃頓首頓首恭惟皇帝陛下大明繼照至德升聞歷數在躬丕承七聖之統仁恩徧物允屬萬邦之歸臣職守郡符不獲躬詣闕庭無任瞻天望聖歡呼激切之至謹奉表稱賀以

聞臣某誠歡誠抃頓首頓首謹言

謝傳宣告諭表

臣某言今月初九日內殿承制閣門祇候向子履到本
州告諭兼賜官吏軍員將校僧道百姓等勅書一道者
聖神纘紹光輝千載之期命令布宣撫諭萬方之衆在
使華之所及荷天語以無窮臣某誠感誠戴頓首頓首
恭惟皇帝陛下德合祖宗仁齊堯舜繼鴻圖之赫赫膺
寶歷之綿綿孚號惟新頒十行之溫詔望雲胥慶起四

海之誠心臣職守郡符不獲奔詣闕廷臣無任感天荷
聖激切屏營之至謹奉表稱謝以聞臣某誠感誠戴頓
首頓首謹言

賀太后表

臣某言伏聞皇太后權同軍國事纘紹丕圖當聖人之
恭默緝熙初政繫文母之聰明渙號亟傳羣情均慶臣
某誠歡誠抃頓首頓首恭惟皇太后陛下德齊天妹位
統坤儀紹任姒之大猷贊勛華之至治六宮欽戴慕美

化于積年四海人安聽徽音于此日臣職拘守土不獲
稱慶闕廷臣無任瞻天望聖激切屏營之至

謝轉朝議表

臣某言今月七日進奏院遞到告一道蒙恩特授左朝
議大夫依舊知明州軍州兼管內勸農使者天澤徧沾
不遺微物聖恩遐暨爰及孤生奉綸綍之訓辭厲冰淵
之誠敬臣某誠惶誠懼頓首頓首恭惟皇帝陛下堯仁
天縱舜知日新紹七聖以丕承懷萬邦之欣戴廣宣初

欽定四庫全書

錢塘集
卷八

政之惠首念羣臣之勞隨班聯而汎遷盡中外而均被如風之行而鼓舞羣動若春之感而榮華一時而臣假守海濱叨蒙乾施雖積罔功之愧亦陞寄祿之階臣敢不俯伏再思竊慕循牆之德夙宵不懈以圖報稱之能庶幾小已之愚不負大鈞之賜臣無任感天荷聖激切屏營之至謹奉表稱謝以聞

賀生皇子表

臣某言伏奉四月十五日詔書以皇子生大赦天下者

誕育元良偉矣九重之慶廣宣恩宥驩然四海之情盛
宗社之光華動生靈之鼓舞臣某誠歡誠抃頓首頓首
恭惟皇帝陛下丕承帝業仰合天心參化育之至仁措
幅員於極治慶流百世前星俄照於龍樓賚及萬方睿
澤爰頒於鳳闕羣心欣戴和氣充盈臣職守郡符不獲
奔詣闕廷臣無任瞻天頌聖激切歡呼之至謹奉表稱
賀以聞

賀天寧節表

臣某言邁聖誕之昌長千齡協慶仰天寧之盛節四海均歡皞如鼓舞之情穆若照臨之下臣某誠歡誠忭頓首頓首恭惟皇帝陛下仁齊堯舜業紹祖宗履重熙而抑畏不矜幹萬化而持循以正坦闕直言之路增深極治之源慶期遇震夙之時列辟奉忠勤之禱當年飛電曾形繞斗之祥此日稱觴感祝後天之筭臣幸逢華旦僻守偏州遠有列之周行心馳魏闕祈無疆之睿筭願效華封臣無任瞻天頌聖激切歡呼之至謹奉表稱賀

以聞

謝賜歷日表

臣某言今月二十八日進奏院遞到宣一道賜臣建中靖國元年歷日一卷歷為大紀正中朔而不差恩出九重被邇遐而無外拜賜爰欽於敬授披文彌謹於寅遵臣某誠惶誠懼頓首頓首恭惟皇帝陛下建皇極以承天亶聰明而御世發政施仁而民神斯悅對時育物而陰陽以和勅密法於日官布成書於海寓孚號遽先於

正歲分頒逮逮於守臣臣敢不上體睿慈下修官政勤
督耕桑之務皆使先期仰承德惠之行必圖推廣庶有
毫釐之補不辜覆燾之恩臣無任瞻天望聖激切屏營
之至謹奉表稱謝以聞

慰表

臣某言伏奉正月十四日大行皇太后遺誥者東朝上
僊奄棄大養率土仰戀莫非羣悲臣某誠哀誠咽頓首
頓首恭以大行皇太后坤德承天陰功被世颺御遽遠

徽音永傳中外一心感泣萬里伏惟皇帝陛下孝慕罔
極聖情難居願抑九重之哀以安四海之望臣拘守遠
郡不獲匍匐奔詣闕廷臣無任瞻天望聖悲摧殞咽之
至謹奉表稱慰以聞臣某誠哀誠咽頓首頓首謹言

謝致仕表

臣某言八月二十九日伏奉敕命宜守本官致仕者引
年以請俯慙無補於明時得謝而歸仰荷曲成於洪造
拜聖恩而知幸揣愚分於增榮臣某誠惶誠懼頓首頓

首伏念臣倥侗寒品樸樛小材由末學以奮軀邁昌辰而從仕涵泳五朝之德澤超踰四紀之光陰或宣化於便藩或司賓於華省按刑將漕屢玷於選掄竊祿尸官終逃於譴責爰及暮年之至自惟陳力之難乞身欲遂於屏居承命獲從於善去豈其孤賤能爾保全此蓋皇帝陛下舜知日躋堯仁天覆深固太平之業恢隆純被之風使萬物各安其生無匹夫或失其所致臣衰朽幸此退休臣敢不完一節于餘生報大鈞之巨賜雖同老

馬力弗逮於繼棧願比露葵心不忘於向日臣無任瞻
天荷聖激切屏營之至謹奉表稱謝以聞

賀天寧表

臣某言遇聖明之誕節玉帛奔趨起臣子之誠心簪紳
鼓舞幸際千齡之盛仰祈萬壽之隆臣某誠歡誠抃頓
首頓首恭惟皇帝陛下仁參化育治極明昌廣一德以
承天正四維而御國持盈成而守之抑畏志紹述而慎
所更張樂聞正直之言坦闢大中之路慶辰惟永四方

欽震夙之期睿筭無疆百辟共歡呼之禱臣恪司海郡
遙拱楓庭仰盛旦之輝光念周行之高遠捧觴稱慶徒
想紫宸之班向日傾誠願效華封之祝臣無任瞻天頌
聖激切屏營之至謹奉表稱賀以聞臣某誠歡誠抃頓
首頓首謹言

代陳少卿賀福康公主進封充國表

中宸有命美化務先於族親貴主進封優恩不奪於典
禮風聲遐被中外交忻臣誠歡誠喜頓首頓首恭惟尊

號皇帝陛下配天地之德紹祖宗之基守無逸於持盈
概至公於立極御遠以近齊邦以家治內等周官之規
訓女偕帝堯之法罔媿前躅克成令猷公主分乾之英
體巽之順雖曰愛之欲富不以生而暴榮豈湯沐不可
一而充印綬不可一而足蓋誨育之存節故寵私之有
階龍光一宣慈孝兩得教其有素下嫁豈忘其矩儀澤
匪不隆四方孰謂之偏黨朝野懽浹人神氣和邁治古
之休光增太平之盛事臣限以官守不獲奔走闕廷稱

慶臣無任瞻天踴躍之至

賀苗淑妃進封賢妃表

正寧留神內張輔佐後宮進善下帥嬪嬙恩蓋盛於得人命實優於中禮綸言一出驩頌交流中謝恭惟尊號皇帝陛下嗣臨四方寶守重器萬機閒暇至化清明尚宵旰以圖徽猶起居而謀治列位既登乎俊哲中闈復選乎才良意出入之有裨庶言動之無失何則賢者得之殊稱妃由配以為名龍光不私遐邇稱慶膠木存逮下

之諭美有所歸鷄鳴著相戒之勤驗在今日助陰教之
綱紀副聖心之簡求法貽彤管之書寵絕椒房之侈心
忘私謁風永邁於周南儉不曳衣譽難專於漢室全一
時之令典綿千載之昌期臣限以官守不獲蹈舞闕廷
無任瞻天踴躍之至

代劉兵部賀充國公主出降表

臣某言伏審六月日內降白麻福康公主進封充國出
降者禮盛太平烏奕本朝之事勢榮下嫁光華舊戚之

門築館据乎魯經附駢於漢制表正人倫之大藩維
帝祚之長四方聞風萬口稱慶臣某誠懽誠喜頓首頓
首恭惟尊號皇帝陛下荷祖宗之業挾堯舜之心循降
女之前規發慕親之至德賜公主以充國之號乃陛下
愛育之深歸公主於皇舅之家蓋陛下孝思之永延寵
休於勿絕繼懽好而又新物儀所稽豐約惟古義評周
什車服避帝后之尊言采庶臣資送減先皇之子聖明
一舉慈順兩全遠貽冊史之昭章幽致廟靈之悅喜臣

限以官守在遠不獲奔走闕庭蹈舞稱賀卑情無任瞻
天踴躍之至謹差某奉表以聞

又代陳少卿表

伏審六月日內降白麻充國公主出降者國儀慎重中
宸鑒古而展成陰禮章明公主益封而下嫁冠人倫之
綱紀壯帝室之藩垣華夏布傳臣民慶忭恭惟我尊號
皇帝陛下嗣守鉅業積隆太平敦睦族之令猷循降女
之故事迺以充國公主進加湯沐選尚親賢下適皇舅

之家上崇先后之德烏奕累世光華一門斯見聖明之
心實隆仁孝之本肅雍所詠未墜周人之詩資送不踰
尚存唐相之議榮歡乎戚里之舊悅懌乎宗祊之靈臣
限以守職在外不獲舞蹈門闕無仕瞻天忭躍之至

代陳少卿謝宣賜歷日表

臣某言十二月日進奏院遞到宣一道伏蒙聖恩賜臣
嘉祐三年歷日者璣齊七政仰符天度之明歷校四時
專責日官之職霈綸言於庶土布歲令於前期四方守

臣百拜稱慶臣某誠懼誠喜頓首頓首恭惟尊號皇帝
陛下紹隆三聖合德二儀教化醇醲人神說喜經紀以
之順動陰陽以之久調積為至和充塞無外竝成密法
杪忽不遺妙探靈憲之精高軼清臺之課求端上贊班
朔下傳臣忝列分符預叨被賜敢不奉藏如禮聽受以
時勿稽民事之期以戴君恩之重臣無任瞻天激切之
至

代潘郎中遺表

臣某言臣竊祿清朝媿無補報守符偏壘將及罷歸被疾暴深假息垂盡君門嚴邃不復曳裾天造始終唯增隕涕謝竊念臣生匪令器素持孤蹤藉先蔭之餘休遭明時而從宦間關三紀朴直一心內無毫髮之私外乏錙銖之援仰叨覆育幸免棄遺承命再頒於郡條積官一至於郎署寵澤逾分夙宵靡寧凡有益於民敢不盡力或害于政未嘗少容誓竭涓塵之勞冀酬穹壤之德而桑榆遽逼溝壑即填神魂雖飛忠赤未折誠無顯效

附竹帛而可傳夫何哀鳴瀆旒宸而不避然臣冒恩銜
感非木石之頑故臣忍死獻言伸大馬之戀臣歷任三
十餘年兩次知州並無公私過犯本家未有兒孫食祿
欲乞一恩例沾及寒族臣長男震年若干習進士業伏
望聖慈特賜俞允於文資內安排干冒天聰臣無任仰
望闕廷涕戀之至臣某誠惶誠懼頓首頓首謹言

代張郎中謝轉官表

臣某言今月五日進奏院降到勅告各一道授臣前件

官者年勞無狀惟日積憂天造不遺以時序進對寵靈之優渥震肝胆以悸慙中伏念臣性實迂疏才非博敏粗知古道早玷仕途所至雖切切厲精所施無班班顯績堅撻履於孤立抱朴忠而自明一叨符竹之休恩三易江湖之善壤顧惟宣力不足慰朝廷之思尚且偷榮未能安田里之分伏蒙皇帝陛下大明委照沛澤遠沾綮之以日月之勤陞之以班秩之次在陛下馭臣之術可謂至公於微臣報主之情不勝多媿敢不永固晚節

誓殫寸誠恐懼深前循益恭之克戒作為慎末期後效
之有聞庶幾犬馬之心上答乾坤之賜

代章郎中賀郊赦表

祀展園丘方畢就陽之禮慶流沛澤盡冒如天之仁遐
邇同心忭躍稱頌臣誠歡誠喜頓首頓首恭惟皇帝陛
下享三靈之祐紹四聖之休躋純治於重熙廓至明而
繼照端若持盈之慮巍然獨斷之權更為必顧於適時
發政必謀于師古推重嚴禋之典首務躬行誕敷寬宥

之恩復仍舊貫凡在幅員之內孰非鼓舞之情臣限守
遠疆阻奔盛事奉承明詔敢怠於宣揚荷戴洪鈞益深
於感激臣無任瞻天望聖懇切屏營之至

謝傳宣撫問表

臣某言今日到渝州傳宣撫問者星輶遽至聳遐裔
之觀瞻天語敬傳卹遠臣而存問一時鼓舞萬里先華
拜命肅恭戴恩跼蹐臣某誠惶誠懼頓首頓首恭惟皇
帝陛下明齊舜智德邁堯仁紹統業於重熙納生靈於

極治垂衣而化務綏靖於方隅軫慮以時念勤勞於邊
徼遣使謹奔馳之役宣言示撫勞之深臣敢不上體聖
慈下修官業誓殫直節以圖分寸之能仰報大鈞不負
生成之賜臣無任瞻天荷聖激切屏營之至

謝宣賜歷日表


臣某言今日日進奏院遞到宣一道賜臣紹聖五年歷
日一卷者統合天心國永明昌之盛歷頒春始恩無遠
邇之殊拜賜欣榮披文寅敬臣某誠惶誠懼頓首頓首

恭惟皇帝陛下仁參覆載智運聖神對時育物而生成
不偏導民務本而補助有法飭日官而謹職布歲令以
授人粲若成書軼清臺之精密錫為大紀俾率土以奉
行臣敢不益厲愚衷虔膺明貺承流於郡邑贊施德
於朝廷戒以奪農全東作西成之力斥其暴物順陽舒
陰慘之期倘小補於熙辰庶仰酬於洪造

賀興龍節表

臣某言伏以呂助黃鍾適慶歲成之候虹流華渚咸欽

聖誕之辰域中均鼓舞之情方外謹梯航之供聲教所
暨欣愉率同臣某誠歡誠忭頓首頓首恭惟皇帝陛下
德合勛華仁參覆載正法度以繼承六聖端政化以綱
紀四方紛然符瑞之臻至矣明昌之盛光輝慶節隆冬
秀八莢之莫肅敬稱觴列辟奉萬年之壽臣官居夔服
迹遠楓宸傾向日之誠心遙瞻魏闕祝後天之睿筭竊
效華封臣無任瞻天頌聖驩呼激切之至



錢塘集卷八